



MOCIÓN DO GRUPO MUNICIPAL FERROL EN COMÚN PARA QUE OS CONCELLOS RECIBAN 1/3 DAS AXUDAS CON ORIXE NOS FONDOS EUROPEOS DE RECUPERACIÓN

O Grupo Municipal Ferrol en Común, ao abeiro do disposto nos artigos 104 do Regulamento de organización, funcionamento e réxime xurídico das entidades locais, presenta no Pleno da Corporación Municipal a moción para que os Concellos reciban 1/3 das axudas con orixe nos fondos europeos de recuperación.

Exposición de motivos

Os concellos son a administración pública máis próxima da cidadanía e a que mellor coñece as súas necesidades. Así mesmo, son os concellos quen ofrecen grande parte dos servizos básicos, xeran espazos públicos urbanos, contribúen a xerar emprego, coidan das persoas e do medio ambiente, articulan a convivencia, manteñen o espazo público e moitos outros servizos públicos que transcenden na calidade de vida das persoas.

A pesar disto, son as administracións que menos dispoñen dun financiamento seguro, no marco xeral dun sistema inxusto, discriminatorio e insuficiente. Manexando escasamente o 15% do total do gasto público realizado no conxunto do Estado, situado nuns 70.000 millóns de euros, e contando escasamente co 20% dos 2.500.000 millóns de empregados e empregadas públicas. Unha situación en desvantaxe con outros niveis administrativos que evidencia que o Estado español aínda ten pendente a necesaria reforma municipal que permita un financiamento suficiente e sostible dos concellos, con criterios de progresividade, xustiza social e sostibilidade ambiental.

O sistema de financiamento dos Concellos está moi alonxado dos parámetros das entidades locais doutros países europeos e é unha reivindicación histórica do

municipalismo e da FEMP a participación nun 33% para os Concellos. E aínda así, o propio 'Plan presupuestario 2020 do Reino de España' recoñece que as entidades locais veñeen obtendo resultados fiscais de superávit desde o 2012.

Neste contexto estrutural, España recibirá nos próximos seis anos 140.000 millóns de euros do Fondo de Recuperación da Unión Europea para combater a crise da Covid-19. Unha cifra que semella dunha dimensión enorme se temos en conta que os fondos gastados no sexenio 2014-2020 no alcanzaron nin os 16.000 millóns. Ademais, o 70% destes fondos terán que ser destinados a proxectos específicos xa entre o ano 2021 e 2022. O 30% restante terá que asignarse no 2023 aínda que os pagamentos perderán prolongarse ata o ano 2026.

Estamos, polo tanto, diante dun período moi breve de tempo no que as administracións públicas terán que executar un gasto moi superior aos fondos estruturais de investimento asignados en 2014-2020, que eran 40.000 millóns de euros e que chegaran ao mesmo tempo que o resto de fondos comunitarios. Un reto para a capacidade de gasto das administracións públicas e no que deberían ter capacidade de decisión todos os seus niveis, tamén, e especialmente, o local.

Os Concellos poden ser unha ferramenta fundamental para executar ese gasto e, ademais, poden recoñecer mellor as necesidades máis inmediatas das poboacións locais, unha proximidade que é aínda máis útil no actual contexto' de crise sanitaria e económica, por iso debe garantirse que no reparto destes fondos tamén se conta cos Concellos, ben sexa a través de asignacións directas ben sexa mediante proxectos transversais e supramunicipais.

Unha coordinación e transversalidade que compre facer dende do marco institucional galega e para o que compre establecer un modelo de diálogo entre as administracións públicas, axentes sociais e axentes socioeconómicos galegas, para poder garantir que as iniciativas e propostas financiadas a través destes fondos son as máis necesarias.

Por todo o anterior, o Grupo Municipal de Ferrol en Común presenta á consideración do Pleno o seguinte ACORDO:

1. Instar ao goberno do Estado a organizar un mecanismo de reparto do Fondo de Recuperación europeo para que este poida ser executado nun 33% polos Concellos, un 20% de xeito directo e un 13% en proxectos transversais ou supramunicipais.
2. Instar á Xunta de Galicia a impulsar un mecanismo de diálogo entre as administracións públicas, axentes sociais e axentes socioeconómicos galegas para a correcta administración Fondo de Recuperación europeo no noso país.
3. Dar conta deste acordo aos órganos de goberno da FEGAMP, da FEMP, así como a todos os grupos do Parlamento de Galicia, e a todos os grupos que contan con representación galega nas cortes do Estado.

Ferrol, 27 de xaneiro de 2020

Jorge Suárez Fernández
Voceiro do GM Ferrol en Común